

---

This is a reproduction of a library book that was digitized by Google as part of an ongoing effort to preserve the information in books and make it universally accessible.

Google<sup>TM</sup> books

<https://books.google.com>





## Über dieses Buch

Dies ist ein digitales Exemplar eines Buches, das seit Generationen in den Regalen der Bibliotheken aufbewahrt wurde, bevor es von Google im Rahmen eines Projekts, mit dem die Bücher dieser Welt online verfügbar gemacht werden sollen, sorgfältig gescannt wurde.

Das Buch hat das Urheberrecht überdauert und kann nun öffentlich zugänglich gemacht werden. Ein öffentlich zugängliches Buch ist ein Buch, das niemals Urheberrechten unterlag oder bei dem die Schutzfrist des Urheberrechts abgelaufen ist. Ob ein Buch öffentlich zugänglich ist, kann von Land zu Land unterschiedlich sein. Öffentlich zugängliche Bücher sind unser Tor zur Vergangenheit und stellen ein geschichtliches, kulturelles und wissenschaftliches Vermögen dar, das häufig nur schwierig zu entdecken ist.

Gebrauchsspuren, Anmerkungen und andere Randbemerkungen, die im Originalband enthalten sind, finden sich auch in dieser Datei – eine Erinnerung an die lange Reise, die das Buch vom Verleger zu einer Bibliothek und weiter zu Ihnen hinter sich gebracht hat.

## Nutzungsrichtlinien

Google ist stolz, mit Bibliotheken in partnerschaftlicher Zusammenarbeit öffentlich zugängliches Material zu digitalisieren und einer breiten Masse zugänglich zu machen. Öffentlich zugängliche Bücher gehören der Öffentlichkeit, und wir sind nur ihre Hüter. Nichtsdestotrotz ist diese Arbeit kostspielig. Um diese Ressource weiterhin zur Verfügung stellen zu können, haben wir Schritte unternommen, um den Missbrauch durch kommerzielle Parteien zu verhindern. Dazu gehören technische Einschränkungen für automatisierte Abfragen.

Wir bitten Sie um Einhaltung folgender Richtlinien:

- + *Nutzung der Dateien zu nichtkommerziellen Zwecken* Wir haben Google Buchsuche für Endanwender konzipiert und möchten, dass Sie diese Dateien nur für persönliche, nichtkommerzielle Zwecke verwenden.
- + *Keine automatisierten Abfragen* Senden Sie keine automatisierten Abfragen irgendwelcher Art an das Google-System. Wenn Sie Recherchen über maschinelle Übersetzung, optische Zeichenerkennung oder andere Bereiche durchführen, in denen der Zugang zu Text in großen Mengen nützlich ist, wenden Sie sich bitte an uns. Wir fördern die Nutzung des öffentlich zugänglichen Materials für diese Zwecke und können Ihnen unter Umständen helfen.
- + *Beibehaltung von Google-Markenelementen* Das "Wasserzeichen" von Google, das Sie in jeder Datei finden, ist wichtig zur Information über dieses Projekt und hilft den Anwendern weiteres Material über Google Buchsuche zu finden. Bitte entfernen Sie das Wasserzeichen nicht.
- + *Bewegen Sie sich innerhalb der Legalität* Unabhängig von Ihrem Verwendungszweck müssen Sie sich Ihrer Verantwortung bewusst sein, sicherzustellen, dass Ihre Nutzung legal ist. Gehen Sie nicht davon aus, dass ein Buch, das nach unserem Dafürhalten für Nutzer in den USA öffentlich zugänglich ist, auch für Nutzer in anderen Ländern öffentlich zugänglich ist. Ob ein Buch noch dem Urheberrecht unterliegt, ist von Land zu Land verschieden. Wir können keine Beratung leisten, ob eine bestimmte Nutzung eines bestimmten Buches gesetzlich zulässig ist. Gehen Sie nicht davon aus, dass das Erscheinen eines Buchs in Google Buchsuche bedeutet, dass es in jeder Form und überall auf der Welt verwendet werden kann. Eine Urheberrechtsverletzung kann schwerwiegende Folgen haben.

## Über Google Buchsuche

Das Ziel von Google besteht darin, die weltweiten Informationen zu organisieren und allgemein nutzbar und zugänglich zu machen. Google Buchsuche hilft Lesern dabei, die Bücher dieser Welt zu entdecken, und unterstützt Autoren und Verleger dabei, neue Zielgruppen zu erreichen. Den gesamten Buchtext können Sie im Internet unter <http://books.google.com> durchsuchen.

PT

1534

AG

W11



GAYLORD			PRINTED IN U.S.A.

PRINTED IN U.S.A.

PT

1534

A6

W11

UNIVERSITY  
LIBRARY

# DER ARME HEINRICH

HERRN HARTMANNS VON AUE

UND

ZWEI JÜNGERE PROSALEGENDEN

VERWANDTEN INHALTES.

---

FÜR DEN GEBRAUCH IN VORLESUNGEN

*Karl Heinrich*

HERAUSGEGEBEN VON

WILHELM WACKERNAGEL.

---

BASEL.

SCHWEIGHAUSERISCHE VERLAGSBUCHHANDLUNG.

MDCCCLV.

dr

A. 58132

~~10053561~~

DB



# DER ARME HEINRICH

**HERRN HARTMANNS VON AUE.**

**Abdruck der Strassburger Handschrift in Müllers Sammlung Deutscher Gedichte aus dem 12, 13 und 14 Jahrhundert Th. 1 und in der Ausgabe der Brüder Grimm; der Handschrift von Kolocza in dem Koloczaer Codex altdentscher Gedichte von Mailäth und Köffinger; Vergleichung der Heidelbergischen in den Ausgaben der Brüder Grimm und Haupts.**

**Erste kritische Bearbeitung von Lachmann in dessen Auswahl aus den Hochdeutschen Dichtern des dreizehnten Jahrhunderts, 1820; die letzte von Haupt: Die Lieder und Büchlein und der Arme Heinrich von Hartmann von Aue, 1842.**

## DIZ IST VON DEM ARMEN HEINRICH.

---

- Ein ritter sô gelêret was,  
daz er an den buochen las,  
swaz er dar an geschriben vant:  
der was Hartman genant;  
5 dienstman was er ze Ouwe.  
er nam im mange schouwe  
an mislîchen buochen:  
dar an begunde er suochen,  
ob er iht des funde,  
10 dâ mite er swære stunde  
möhte senfter machen,  
und von sô gewanten sachen,  
daz gotes êren töhte  
und dâ mite er sich möhte  
15 gelieben den liuten.  
nû beginnet er iu diuten  
ein rede, die er geschriben vant.

dar umbe hât er sich genant,  
 daz er sîner arbeit,  
 20 die er dar an hât geleit,  
 mit âne lôn belibe,  
 und swer nâch sinem lîbe  
 sî huere sagen oder lese,  
 daz er im bitende wese  
 25 der sêle heiles hin ze gote.  
 man seit, er sî sîn selbes bote  
 unde erlœse sich dâ mite,  
 swer über des andern schulde bite.

Er las diz selbe mære,  
 30 wie ein herre wære  
 ze Swâben gesezzen;  
 an dem enwas vergezzen  
 deheiner der \* tugent,  
 die ein ritter in sîner jugent  
 35 ze vollem lobe haben sol.

---

21. *Die Strassburger Handschrift* N. 1. *die Heidelberger*  
*und die von Kolocza Ane lon* 30. *Die Hand-*  
*schriften* Wie daz: *gebessert von Lachmann.*  
 33. *Strassb. HS. Dekeine, Heidelb. u. Kol. Aller:*  
*Lachmann in der Auswahl Dekeinü der tugende —*  
*jugende, bei Haupt deheine wis der tugent*

man sprach dô niemen alsô wol  
in allen den landen.

er hete ze sinen handen  
geburt und dar zuo rîcheit;

40 ouch was sîn tugent vil breit.

swie ganz sîn habe wære,

sîn burt unwandelbære

und wol den fürsten gelîch,

doch was er unnâch alsô rîch .

45 der geburt und des guotes

sô der êren und des muotes.

Sîn name was gar erkennelich:

er hiez der herre Heinrich

und was von Ouwe geborn.

50 sîn herze hâte versworn

valsch und alle törperheit,

und behielt ouch vaste den eit

stæte unz an sîn ende.

ân alle missewende

55 stuont sîn êre und sîn leben.

im was der rehte Wunsch gegeben

ze werltlichen êren;

die kunde er wol gemêren

mit aller hande reiner tugent.

- 60 er was ein bluome der jugent,  
 der werlte fröude ein spiegelglas,  
 stæter triuwe ein adamas,  
 ein ganziu krône der zuht.  
 er was der nôthaften fluht,
- 65 ein schilt sîner mâge,  
 der milte ein glichiu wâge:  
 ime enwart über noch gebrast.  
 er truoc den arbeitsamen last  
 der êren über rücke.
- 70 er was des râtes brücke  
 und sanc vil wol von minnen.  
 alsus kund er gewinnen  
 der werlte lop unde pris.  
 er was hübesch und dar zuo wis.
- 75 Dô der herre Heinrich  
 alsô geniete sich  
 êren unde guotes  
 und frœliches muotes  
 und werltlicher wünne
- 80 und was für al sîn künne
- 
68. *Besserung Lachmanns: Heidelb. u. Kol. die arbeit*  
 als ein last, *Strassb.* der ersamen last 80. und]  
*die HSS. Er*

- gepriset unde geêret:  
 sîn hôchmuot wart verkêret  
 in ein leben gar geneiget.  
 an ime wart erzeiget
- 85 als ouch an Absalône,  
 daz diu üppige krône  
 werltlicher süeze  
 vellet under füeze  
 ab ir besten werdekeit,
- 90 als uns diu schrift hât geseit.  
 ez spricht an einer stat dâ  
 „*media vita*“  
 „*in morte sumus*“:  
 daz bediutet sich alsus,
- 95 daz wir in dem tôde sweben,  
 sô wir aller beste wænen leben.
- Dirre werlte veste,  
 ir stæte, unde ir beste  
 unde ir græste magenkraft,
- 100 diu stât âne meisterschaft.

---

82. *Besserung Haupts*: Strassb. hoher muot; *Heidelb.*  
 u. *Kol.* daz wart im schire verkeret    88. *Bes-*  
*serung Haupts*: Strassb. Vellet nider vnder die f.,  
*Heidelb. Kol.* gezuckete (86 der die) under die f.

des muge wir an der kerzen sehen  
ein wârez bilde geschehen,  
daz sî zeiner eschen wirt,  
enmitten dô sî lieht birt.

105 wir sîn von bræden sachen.  
nû sehent, wie unser lachen  
mit weinen erlischet.  
unser slieze ist vermischet  
mit bitterre gallen.

110 unser bluome der muoz vallen,  
so er aller grûenest wænet sîn.  
an hern Heinriche wart wol schîn:  
der in dem hœhsten werde  
lebet ûf dirre erde,

115 derst der versmæhete vor gote.  
er viel von sîme gebote  
ab sîner besten werdekeit  
in ein versmæhelichez leit:  
in ergreif diu miselsuht.

120 dô man die swæren gotes zuht  
gesach an sînem lîbe,  
manne unde wîbe

---

114. *Besserung Haupts: HSS. lebete, lebte*



wart er dô widerzæme.  
nû sehent, wie gar genæme  
125 er ê der werlte wære,  
und wart nû also unmære,  
daz in niemen gerne an sach;  
also ouch Jôbe geschach,  
dem edeln und dem rîchen,  
130 der ouch vil jæmerlichen  
dem miste wart ze teile  
mitten in sîme heile.

Und dô der arme Heinrich  
alrêst verstuont sich,  
135 daz er der werlte widerstuont,  
als alle sîne glichen tuont,  
dô schiet in sîn bitter leit  
von Jôbes gedultekeit.  
wan ez leit Jôb der guote  
140 mit gedultigem muote,  
do ez ime ze lidenne geschach,  
durch der sêle gemach  
den siechtuom und die swacheit,  
die er von der werlte leit;  
145 des lobet er got und fröute sich.  
dô tet der arme Heinrich

leider niender alsô:

wan er was trûrec und unfrô.

sîn swebendez herze daz verswanc;

150 sîn swimmendiu fröude ertranc.

sîn hôchvart muoste vallen;

sîn honec wart ze gallen.

ein swinde vinsten donreslac

zerbrach im sînen mitten tac;

155 ein trûebeze wolken unde die

bedaht im sîner sunnen blic.

er sente sich vil sêre,

daz er sô manege êre

hinder im müeste lâzen.

160 verfluochet und verwâzen

wart vil ofte der tac,

dâ sîn geburt ane lac.

Ein wênece frôuwet er sich doch

von eime trôste dannoch:

165 wan im wart dicke geseit,

daz disiû selbe siecheit

---

149. 150. *Besserung Lachmanns: Strassb. verswant—*  
*wart ertrant, Heidelb. Kol. Sin swebende vroude*  
*im versanc sin swimmendez herze daz ertranc*

- wære vil mislich  
und etelichiu genislich.  
des wart vil maneger slahte  
170 sîn gedinge und sîn ahte.  
er gedâhte, daz er wære  
vil lihte genisbære,  
und fuor alsô drâte  
nâch der arzâte râte  
175 gegen Munpasiliere.  
dâ vant er vil schiere  
niht wan den untrôst,  
daz er niemer würde erlöst.  
Daz hôrte er gar ungerne  
180 und fuor gegen Salerne  
und suocht ouch dâ durch genist  
der wîsen arzâte list.  
den besten meister er dâ vant,  
der seite ime zehant  
185 ein seltsæne mære,  
daz er genislich wære  
und wær doch iemer ungenesen.  
dô sprach er „wie mac daz wesen?  
dû redest harte unmtiglich.  
190 bin ich gnislich, sô genise ich,

- und swaz mir für wirt geleit  
 von guote oder von arbeit,  
 daz trûwe ich voHebringen.“  
 „nû lât daz gedingen“
- 195 sprach der meister aber dô.  
 „iuwerre sûhte ist alsô  
 (waz frumt, daz ichz iu kunt tuo?):  
 dâ hœret arzenie zuo:  
 des wærent ir genislîch.
- 200 nu enist ab nieman sô rîch  
 noch von sô starken sinnen,  
 der si mûge gewinnen.  
 des sint ir iemer ungenesen,  
 got welle dan der arzât wesen.“
- 205 Dô sprach der arme Heinrich  
 „war umbe untrœstent ir mich?  
 jâ hân ich guotes wol die kraft:  
 ir enwellent iuwer meisterschaft  
 und iuwer reht ouch brechen
- 210 und dar zuo versprechen  
 beidiu mîn silber und mîn golt,

---

200. *Besserung Haupts*: Strassb. aber; in Heidelb. u.  
 Kol. 188—209 gekürzt.      207. Strassb. Joch  
 211. *Besserung Lachmanns*: HSS. Beide; ebenso 275.

- ich mache iuch mir alsô holt,  
daz ir miçh harte gerne nert.“  
„mir wære der wille unrewert“  
215 sprach der meister aber dô;  
„und wære der arzenie alsô,  
daz man sî veile funde,  
oder daz man sî kunde  
mit deheinen dingen erwerben,  
220 ich enlieze iuch niht verderben.  
nu enmac des leider niht sîn.  
dâ von muoz iu diu helfe mîn  
durch alle nôt sîn versaget.  
ir müestent haben eine maget,  
225 diu vollen hîbære  
und ouch des willen wære,  
daz sî den tôt durch iuch lite.  
nu enist ez niht der liute site,  
daz ez iemen gerne tuo.  
230 sô høert ouch anders niht dar zuo  
niwan der maget herzen bluot:  
daz wær für iuwer suht guot.“

---

224. *Strassb. muezent, Heidelb. soldet, Kol. scholdet*

225. *Heidelb. Kol. vriebere, Strassb. erbere: vgl.*

447 und 1453.

- Nu erkante der arme Heinrich,  
daz daz wære unmügelich,  
235 daz iemen den erwürbe,  
der gerne für in stürbe.  
alsus was im der trôst benomen,  
ûf den er dar was komen,  
und dar nâch für die selben frist  
240 hât er ze sîner genist  
dehein gedinge mêre.  
des wart sîn herzesêre  
alsô kreftec unde grôz,  
daz in des aller meist verdrôz,  
245 ob er langer solte leben.  
nû fuor er heim und begunde geben  
sîn erbe und ouch sîn varnde guot,  
als in dô sîn selbes muot  
unde wîser rât lêrte,  
250 dâ erz aller beste bekêrte.  
er begunde bescheidenlîchen  
sîn armen friunde rîchen  
und trôst ouch frömede armen,  
daz sich got erbarmen  
255 geruochte ûber der sêle heil;  
gotes hiusern viel daz ander teil.

- alsus sô tet er sich abe  
 bescheidenlîchen sîner habe  
 unz an ein geriute:  
 260 dar flôch er die liute.  
 disiu jæmerlîche geschiht,  
 diu was sîn eines klage niht:  
 in klageten elliu diu lant,  
 dâ er inne was erkant,  
 265 und ouch von frömden landen,  
 die in nâch sage erkanden.

- Der ê diz geriute  
 und der ez dannoch biute,  
 daz was ein frîer bûman,  
 270 der vil selten ie gewan  
 dehein grôz ungemach;  
 daz andern bûren doch geschach,  
 die wîrs geherret wâren,  
 und sî die niht verbâren

---

265. frömden *Besserung Haupts*: Strassb. den; in  
 Heidelb. u. Kol. 261—266 ausgefallen. 267. *Bes-*  
*serung Lachmanns*: Strassb. fehlt è; Heidelb. Kol.  
 Der daz selbe gereute 272. *Besserung Haupts*:  
 HSS. geburen, gehovren, gebowern 274. *Bes-*  
*serung Lachmanns bei Haupt*: Strassb. Vnd siu do,  
 Heidelb. Kol. so si des

- 275 beidiu mit stiure und mit bete.  
swaz dirre gebûre gerne tete,  
des dûhte sinen herren gnuoc;  
dar zuo er in übertruoc,  
daz er dehein arbeit
- 280 von frömdem gewalte leit.  
des was deheiner sîn gelich  
in dem lande alsô rîch.  
zuo deme zôch sich  
sîn herre, der arme Heinrich.
- 285 swaz er in het ê gespart,  
wie wol daz nû gedienet wart,  
und wie schône er sîn genôz!  
wan in vil lützel des verdrôz,  
swaz im geschach durch in.
- 290 er hete die triuwe und ouch den sîn,  
daz er vil willeclîchen leit  
den kumber und die arbeit,  
diu ime ze lidenne geschach.  
er schuof ime rîch gemach.

---

285. *Strassb.* in hette g., *Heidelb. Kol.* im vor hatte  
verspart 289. *Besserung Haupts*: *Strassb.* Swaz  
im zuo lidende g.; in *Heidelb. und Kol.* fehlen  
287—294.



- 295 Got hete dem meier gegeben  
 nâch siner aht ein reinez leben:  
 er hete ein wol erbeiten lîp  
 und ein wol werbendez wîp;  
 dar zuo het er schoeniu kint,  
 300 diu gar des mannes fröude sint,  
 unde hete, sô man saget,  
 under den kinden eine maget,  
 ein kint von ahte jâren.  
 daz kunde wol gebâren  
 305 sô rehte gûetlichen:  
 diu wolte nie entwîchen  
 von ir herren einen fuoz;  
 umbe sine hulde und sinen gruoꝝ,  
 sô diene si ime alle wege  
 310 mit ir gûetlichen pflege.  
 sî was ouch sô genâeme,  
 daz sî wol gezâeme  
 ze kinde dem rîche  
 an ir wætliche.

---

303. *Heidelb. Kol.* Wol von zwelf iaren      314. *Strassb.*  
 werliche, *Heidelb.* mit schöner wetliche oder wer-  
 liche, *Kol.* mit schöner wertliche

- 315 Die andern heten den sin,  
daz sî ze rehter mâze in  
wol gemîden kunden:  
dô flôch sî zallen stunden  
zuo ime und niender anders war.
- 320 sî was sîn kurzewîle gar.  
sî hete gar ir gemûete  
mit reiner kindes gûete  
an ir herren gewant,  
daz man sî zallen zîten vant
- 325 under ir herren fuoze.  
sus wonte diu suoze  
ir herren ze allen zîten bî.  
dar zuo liebet er sî,  
swâ mite er ouch mohte;
- 330 und daz dem kinde tohte  
zuo ir kintlichen spil,  
des gap der herre ir vil.  
ouch half in sêre, daz diu kint  
sô lîhte ze gewenenne sint.
- 335 er gewan ir, swaz er veile vant,

---

330. *Strassb.* Vnd das kinden wol dohte, *Heidelb.*  
*Kol.* daz der meide tochte

- spiegel unde hârbant,  
und swaz kinden lieb sol sîn,  
gürtel unde vingerlîn.  
mit dienste brâht ers ûf die vart,  
340 daz si im alsô heimlich wart,  
daz er sî sîn gemahеле hiez.  
diu guote maget in liez  
belîben selten eine:  
er dûhte sî vil reine.  
345 swie starke ir daz geriete  
diu kindische miete,  
iedoch geliebte irz aller meist  
von gotes gebe ein sûezer geist.  
Ir dienst was sô gûetlich.  
350 dô dô der arme Heinrich  
driu jâr dâ getwelte  
unde im got gequelte  
mit grôzem jâmer den lîp,  
nû saz der meier und sîn wîp  
355 unde ir tohter, diu maget,  
von der ich iu ê hân gesaget,

---

337. HSS. solte, scholde    341. Strassb. immer ge-  
mahel, Heidelb. Kol. gemale

- bî im in ir unnmüezekeit  
und begunden klagen ir herren leit.  
diu klage tet in michel nôt:  
360 wan sî vorhten, daz sîn tût  
sî sêre solte letzen  
und vil gar entsetzen  
êren unde guotes,  
und daz herters muotes  
365 wûrde ein ander herre.  
sî gedâhten alsô verre,  
unz dirre selbe bûman  
alsus frâgen began.

- Er sprach „lieber herre mîn,  
370 mœht ez mit iuvern hulden sîn,  
ich frâgete vil gerne.  
sô vil ze Salerne  
von arzenien meister ist,  
wie kumt, daz ir deheines list  
375 ze iuwerme ungesunde  
niht gerâten kunde?  
herre, des wundert mich.“  
dô holte der arme Heinrich

---

367. *Strassb.* Bitze daz, *Heidelb. Kol.* Daz

tiefen stûft von herzen

- 380 mit bitterlichem smerzen;  
mit solher riuwe er dô sprach,  
daz ime der stûft daz wort zerbrach.

„Ich hân disen schemelichen spot  
vil wol gedienet umbe got.

- 385 wan dû sæhe wol hie vor,  
daz hôh offen stuont mîn tor  
nâch werltlicher wûnne,  
und daz niemen in sime kûnne  
sinen willen baz hete dan ich;

- 390 und was daz doch unmtiglich:  
wan ich enhete niht gar.  
dô nam ich sîn vil kleine war,  
der mir daz selbe wunschleben  
von sinen gnâden hete gegeben.

- 395 daz herze mir dô alsô stuont,  
als alle werlttôren tuont,  
den daz saget ir muot,

---

379. *Besserung Haupts: Heidelb. Kol. Einen t. sunfz*  
(suftz), *Strassb. Tieffen sinfzen* 382. *Besserung*  
*Haupts: Strassb. sinfze; Heidelb. und Kol. ändern*  
*const.* 391. *Strassb. niut vil gar, Heidelb. Kol.*  
*Minen willen hat ich mit vrowen gar*

daz sî êre unde guot

âne got mûgen hân.

400 sus troug ouch mich mîn tumber wân,

wan ich in lützel ane sach,

von des genâden mir geschach

vil êren unde guotes.

dô dô des hôhen muotes

405 den hôhen portenær verdrôz,

die sælden porte er mir beslôz.

dâ kum ich leider niemer in:

daz verworhte mir mîn tumber sin.

got hât durch râche an mich geleit

410 ein sus gewante siecheit,

die niemen mag erlœsen.

nû versmæhent mich die bœsen;

die biderben ruochent mîn niht.

swie bœse er ist, der mich gesiht,

415 des bœser muoz ich dannoch sîn:

sîn unwert tuot er mir schîn;

er wirfet diu ougen abe mir.

nû schînet êrste an dir

---

412. *Strassb.* versmahent, *Heidelb. Kol.* nu versmahe  
ich den b.

- dîn triuwe, die dû hâst,  
 420 daz dû mich siechen bi dir lâst  
 und von mir niht enfliehst.  
 swie dû mich niht enschühst,  
 swie ich niemen liep si danne dir,  
 swie vil dîns heiles stê an mir,  
 425 dû vertrüegest doch wol mînen tôt.  
 nû wes unwert und wes nôt  
 wart ie zer werlte merre?  
 hie vor was ich dîn herre  
 und bin dîn dürftige nû.  
 430 mîn lieber friunt, nû koufest dû  
 und mîn gemahle und dîn wîp  
 an mir den êwigen lip,  
 daz dû mich siechen bi dir lâst.  
 des dû mich gefrâget hâst,  
 435 daz sage ich dir vil gerne.  
 ich kan ze Salerne  
 keinen meister vinden,  
 der sich mîn underwinden

---

423. *Besserung Lachmanns: Strassb. Vnd swie, Heidelb.*  
*Kol.* Wie gerne daz ich si bi dir 436. 437. *Strassb.*  
 Ich kam zuo s. Do kunde ich kein m., *Heidelb. Kol.*  
 ichn konde zu s. Einen m. nirgen v.

getörste oder wolte.

440 mit der genist ich solte  
 miner sühte genesen,  
 daz müeste ein solch sache wesen,  
 die in der werlte nieman  
 mit nihte gewinnen kan.

445 mir wart niht anders dâ gesaget,  
 wan ich müeste haben eine maget,  
 diu vollen hîbære  
 und ouch des willen wære,  
 daz si den tût durch mich lîte

450 und man si zuo dem herzen snite,  
 und mir wære niht anders guot  
 wan von ir herzen daz bluot.  
 nû ist genuoc unmügelich,  
 daz ir deheiniu durch mich

455 gerne lîde den tût.  
 des muoz ich schemelîche nôt

- 
- 440. *Heidelb. Kol.* g. der ich, *Strassb.* wan do mit ich  
 446. *Besserung Haupts:* *Strassb.* Wan daz ich m.  
 han, *Heidelb. Kol.* ich solde haben 447. *Strassb.*  
 die volle manbere; *Heidelb. Kol.* Die in dem willen  
 were daz si niht verbere: *vgl.* 225.



tragen unz an min ende.  
daz mirz got schiere sende!“

- Daz er dem vater hete gesaget,  
460 daz erhôrte ouch diu reine maget:  
wan ez hete diu vil sûeze  
ir lieben herren fûeze  
stânde in ir schôzen.  
man möhte wol genôzen  
465 ir kintlich gemüete  
hin ze der engel gûete.  
siner rede nam si war  
unde marhte si ouch gar;  
si enquam von ir herzen nie,  
470 unz man des nahtes slâfen gie.  
dô si zir vater fûezen lac  
und ouch ir muoter, sô si pflac,  
und si beide entsliefen,  
manegen sûft tiefen  
475 holte si von herzen.  
umbe ir herren smerzen  
wart ir riuwe alsô' grôz,

---

474. *Besserung Haupts: Kol. suftz, Heidelb. sunfz,  
Strassb. siufzen*

daz ir ougen regen begôz  
der slâfenden fûeze.

480 sus erwachte sî diu slêze.

Dô sî der trehene enpfunden,  
si erwachten und begunden  
sî frâgen, waz ir wære  
und welher hande swære  
485 sî alsô stille möhte klagen.  
nu enwolte sî es in niht sagen.  
und dô ir vater aber tete  
vil manege drô unde bete,  
daz si ez ime wolte sagen,  
490 sî sprach „ir möhtent mit mir klagen.  
waz möht uns mê gewerren  
danne umb unsern herren,  
daz wir den suln verliesen  
und mit ime verkiesen  
495 beide guot und êre?  
wir gewinnen niemer mêre  
deheinen herren alsô guot,  
der uns tuo, daz er uns tuot.“

---

480. So Lachmann; Br. Grimm sus erwachte sie:  
Strassb. fehlt sî, Heidelb. Kol. do erwachten die  
suzen

Sî sprâchen „tochter, dû hâst wâr.

500 nû frumt uns leider niht ein hâr  
unser riuwe und dîn klage.  
liebez kint, dâ von gedage.  
ez ist uns alsô leit sô dir.  
leider, nû enmuge wir

505 ime ze keinen staten komen.  
got der hât in uns benomen:  
het ez iemen anders getân,  
der müeste unsern fluoch hân.“

Alsus gesweigten sî sî dô.

510 die naht bleip sî unfrô  
und morne allen den tac.  
swes iemen anders pflac,  
diz enquam von ir herzen nie,  
unz man des andern nahtes gie

515 slâfen nâch gewonheit.  
dô sî sich hete geleit  
an ir alte bettestat,  
sî bereite aber ein bat  
mit weinenden ougen:

520 wan sî truoc tougen  
nâhe in ir gemûete  
die aller meisten gûete,

die ich von kinde ie vernam.  
welch kint getete ouch ie alsam?

- 525 des einen sî sich gar verwac,  
gelebetes morne den tac,  
daz sî benamen ir leben  
umbe ir herren wolte geben.

Von dem gedanke wart sî dô

- 530 vil ringes muotes unde frô  
und hete deheine sorge mê.  
wan ein vorhte tete ir wê,  
sô siz ir herren sagte,  
daz er dar an verzagte,  
535 und swenne siz in allen drin  
getæte kunt, daz sî an in  
der gehenge niht enfunde,  
daz mans ir iht gunde.

Des wart sô grôz ir ungehabe,

- 540 daz ir vater dar abe  
unde ir muoter wart erwahrt  
als ouch an der vordern naht.  
sî rihten sich ûf zuo ir

---

532. *Besserung Haupts: Strassb.* eine vorhte die tet,  
*Heidelb. Kol.* eine klage die tet

- und sprächen „sich, waz wirret dir?  
 545 dū bist vil alwære,  
 daz dū dich sô manege swære  
 von solher klage hâst an genomen,  
 der niemen mac zeim ende komen.  
 war umbe lâstū uns niht slâfen?“  
 550 sus begunden sî sî strâfen;  
 waz ir diu klage töhte,  
 die niemen doch enmöhte  
 verenden noch gebüezen?  
 sus wânden sî die süezen  
 555 gesweigen an der selben stunt:  
 dô was ir wille in vil unkunt.  
 Sus antwurte in diu maget:  
 „als uns mîn herre hât gesaget,  
 sô mac man in vil wol ernern.  
 560 zwære, ir welt mirz danne wern,  
 sô bin ich ze der arzenfe guot.  
 ich bin ein maget und hân den muot:

546. dich] *Heidelb. Kol.* dir, fehlt *Strassb.* 548. *Strassb.*  
 zem, *Heidelb. Kol.* zu 561. *Strassb.* zuo sinre,  
*Heidelb. Kol.* Zu siner arzedie bin ich gut

ê ich in sehe verderben,  
ich wil ê für in sterben.“

565 Von dirre rede wurden dô

trûrec unde unfrô

beide muoter unde vater.

sine tohter die bat er,

daz si die rede lieze

570 und ir herren gehieze,

daz si geleisten möhte,

wan ir diz niht entöhte.

„Tohter, dû bist ein kint,

und dine triuwe die sint

575 ze grôz an disen dingen.

du enmaht es niht für bringen,

als dû uns hie hâst verjehen.

dû hâst des tôdes niht gesehen.

swenn ez dir kumt ûf die frist,

580 daz des dehein rât ist,

---

563. *Strassb.* sihe; *Heidelb. Kol.* liezze, 564 wolde

565. *Heidelb. Kol.* Von dem gedanken; *Strassb.*

wurden siu do 566. *Strassb.* Trurig beide vnd,

*Heidelb. Kol.* beide truric 567. *Heidelb. Kol.* Ir

muter vnd ir v. 573. *HSS.* Er sprach t.

dû enmüezest sterben,  
und möhtst dû danne erwerben,  
dû lebetest gerner dannoch:  
wan dun quæme nie in leider logh.  
585 dâ von tuo zuo dînen munt;  
und wirstû für dise stant  
der rede iemer mære lût,  
ez gât dir ûf dîne hût.“

Alsus sô wânde er sî dô  
590 beidiu mit bete und mit drô  
gesweigen: dô enmohter.  
sus antwurt ime sîn tohter.

„Vater mîn, swie tump ich sî,  
mir wont iedoch diu witze bî,  
595 daz ich von sage wol die nôt  
erkenne, daz des lîbes tôt  
ist starc unde strenge.  
swer ouch dann die lenge  
mit arbeiten leben sol,  
600 dem ist iedoch niht ze wol.  
wan swenne er hie geringet

---

584. *Strassb.* in nie, *Heidelb. Kol.* Du queme nie in  
leit l. 590. *Heidelb. Kol.* beide, *Strassb.* Bede

- und uf sin alter bringet  
den lip mit michelre nôt,  
sô muoz er liden doch den tôt.  
605 ist ime diu sêle danne verlorn,  
sô wære er bezzer ungeboren.  
ez ist mir komen uf daz zil  
(des ich got iemer loben wil),  
daz ich den jungen lip mac geben  
610 umbe daz êwige leben.  
nû sult ir mirz niht leiden.  
ich wil mir unde iu beiden.  
vil harte wol mite varn.  
ich mag iuch eine wol bewarn  
615 vor schaden und vor leide,  
als ich iu nû bescheide.  
ir hânt êre unde guot:  
daz meinet mines herren muot,  
wan er iu leit nie gesprach  
620 und ouch daz guot nie abe gebrach.  
die wile daz er leben sol,  
sô stêt juwer sache wol:  
und lâze wir den sterben,  
sô müezen wir verderben.  
625 den wil ich uns fristen



mit alsô schoenen listen,  
 dâ mite wir alle sîn genesen.  
 nû gunnent mirs: wan ez muoz wesen.“

- Diu muoter weinende sprach,  
 630 dô sî der tochter ernst ersach,  
 „gedenke, tochter, liebez kint,  
 wie grôz die arbeite sint,  
 die ich durch dich erliten hân,  
 und lâ mich bezzern lôn enpfân,  
 635 dan ich dich høre sprechen.  
 dû wilt mîn herze brechen.  
 senfte mir der rede ein teil.  
 jâ wiltû allez dîn heil  
 an uns verwürken wider got.  
 640 wan gedenkest dû an sîn gebot?  
 jâ gebôt er unde bat er,  
 daz man muoter unde vater  
 minne und êre biete,  
 und geheizet daz ze miete,  
 645 daz der sêle rât werde  
 und lanchleben ûf der erde.

---

638. *Strassb. Joch; Heidelb. Kol.* du wilt    646. *Bes-*  
*serung Lachmanns: Strassb. lange leben, Heidelb.*  
*Kol. vnd ein lanch leben*

- dû gihest, dû wellest dîn leben  
umb unser beider fröude geben:  
dû wilt zwäre uns beiden  
650 daz leben vaste leiden:  
wan daz dîn vater unde ouch ich  
gerne leben, daz ist durch dich.  
jâ soltû, liebiu tochter min,  
unser beider fröude sîn,  
655 gar unsers libes wünne,  
ein bluome in dîme künne,  
unsers alters ein stap.  
und lāstû uns über dîn grap  
gestēn von dînen schulden,  
660 dû muost von gotes hulden  
iemer sîn gescheiden.  
daz koufest an uns beiden.“  
„Muoter, ich getrûwe dir  
und minem vater her ze mir  
665 aller der genāden wol,  
der vater unde muoter sol  
leisten ir kinde,

---

653. *Strassb. Joch; Heidelb. Kol.* Du solt 663. *HSS.*

Siu sprach m.

als ich ez wol bevinde  
an iu allertegelich.

670 von iuwern gnâden hân ich  
die sêle und einen schoenen lîp.  
mich lobet man unde wîp,  
und alle, die mich sehende sint,  
sprechent, ich sî daz schoenste kint,  
675 daz sî zer werlte haben gesehen.  
wem solt ich der genâden jehen  
mê dan iu zwein nâch gote?  
des sol ich nâch iuwerm gebote  
iemer mê vil gerne stân.

680 wie michel reht ich dar zuo hân!  
muoter, sæligez wîp,  
sît ich nû sêle unde lîp  
von iuwern genâden hân,  
sô lântz an iuwern hulden stân,  
685 daz ich ouch die beide  
von dem tiuvel scheide  
und mich gote müeze geben.  
jâ ist dirre werlte leben

---

688. *Strassb. Joch; Heidelb. Kol.* dirre kranken werlde  
leben Daz ist der

niuwan der sêle verlust.

690 ouch hât mich werltlich gelust

unz her noch niht berrüeret,

der hin zer helle fûeret.

nû wil ich gote genâde sagen,

daz er in minen jungen tagen

695 mir die stime hât gegeben,

daz ich tîf dîz bröde leben

ahte harte kleine.

ich wil mich alstus reine

antwürten in gotes gewalt.

700 ich fürhte, solt ich werden alt,

daz mich der werlte stüeze

zuhte under fûeze,

als sî vil manegen hât gezogen,

den ouch ir stüeze hât betrogen:

705 sô würde ich nîhte gote entsaget.

gote müeze ez sîn geklaget,

daz ich unz morne leben sol.

mir behaget dîu werlt niht sô wol.

ir meiste liep ist herzeleit:

710 daz sî iu für wâr geseit;

---

702. *Besserung Haupts: HSS. vnder die f.*

- ir stüezer lôn ein bitter nôt,  
 ir langleben ein gæher tôt.  
 wir hân niht gewisses mæ  
 wan hiute wol und morne wê,  
 715 und ie ze jungest der tôt.  
 daz ist ein jâmerlîchiu nôt.  
 ez enschirmet geburt noch guot,  
 schoene, sterke, höher muot;  
 ez enfrumt tugent noch ère  
 720 für den tôt niht mære  
 dan ungeburt und untugent.  
 unser leben und unser jugent  
 ist ein nebel unde ein stoup;  
 unser stæte bibent als ein loup.  
 725 er ist ein vil verschaffen gouch,  
 der gerne in sich vazzt den rouch,  
 ez sî wîp oder man,  
 der diz niht wol bedenken kan  
 und ouch der werlt nâch volgende ist.

---

712. *Besserung der Br. Grimm: Heidelb. Kol.* ist der  
 gehe tot, *Strassb.* ein bitter tot    718. *Besserung*  
*Haupts: Strassb.* sterke noch hoher, *Heidelb. Kol.*  
 sterke wiser    719. *Strassb.* weder t.; *Heidelb.*  
*Kol. t. vnd e.*

730 wan uns ist über den fûlen mist  
der pfeller hie gespreitet:  
swen nû dër blic verleitet,  
der ist zuo der helle geborn  
unde enhât niht mê verlorn

735 wan beide sêle unde lîp.  
nû gedenkent, sæligez wîp,  
mûeterlicher triuwe  
und senftent iuwer riuwe,  
die ir dâ habent umbe mich:

740 sô bedenket ouch der vater sich.  
ich weiz wol, dër mir heiles gan.  
er ist ein alsô biderber man,  
daz er erkennet wol, daz ir  
unlange doch mit mir

745 iuwer fröude mûgent hân,  
ob ich joch lebende bestân.  
belîbe ich âne man bî iu  
zwei jâr oder driu,

---

741. *Strassb.* daz er; 741—745. *Heidelb. Kol.* Der it  
ein also wiser man daz er selden vil wol gn  
Nu wizzet ir wol daz ir ewer vreude mit ir  
Niht lenger muget gehan

- sô ist mîn herre lihte tôt,  
750 und koment in sô grôze nôt  
vil lihte von armuot,  
daz ir mir alsolhez guot  
zeinem manne niht mugent geben,  
ich enmüeze alse swache leben,  
755 daz ich iu lieber wære tôt.  
nû swig wir aber der nôt,  
daz uns niht enwerre  
und uns mîn lieber herre  
wer und alsô lange lebe,  
760 unz daz man mich zeim manne gebe,  
der rîche sî unde wert:  
sô ist geschehen, des ir dâ gert,  
und wænent, mir sî wol geschehen.  
anders hât mir mîn muot verjehen.  
765 wirt er mir liep, daz ist ein nôt;  
wirt er mir leit, daz ist der tôt.  
wan sô hân ich iemer leit  
und bin mit ganzer arbeit  
gescheiden von gemache

---

756. *Strassb.* verswigen; *Heidelb. Kol.* swige wir dirre  
grozen n.

770 mit maneger hande sache,  
 diu den wiben wirret  
 und si ze fröuden irret.  
 nû setzt mich in den vollen rât,  
 der dâ niemer zergât.

775 mîn gert ein frier bûman,  
 dem ich wol mînes lîbes gan.  
 zwâre, dem sult ir mich geben:  
 sô ist geschaffet wol mîn leben.  
 im gêt sîn pfluoc harte wol;

780 sîn hof ist alles râtes vol;  
 da enstirbet ros noch daz rint;  
 da enmüent diu weinenden kint;  
 da enist zeheiz noch ze kalt;  
 dâ wirt von jâren niemen alt:

785 der alte wirt junger;  
 da enist fröst noch hunger;  
 da enist deheimer slahte leit:  
 da ist ganziu fröude ân arbeit.

---

781. *Strassb.* weder ros noch rint; *Kol.* Donen muet  
 ros noch die r., *Heidelb.* Da en mevt ros noch r.

782. *Lachmann* müejent: *Strassb.* mügent; *Heidelb.*  
*Kol.* Noch die 783. *Kol.* Den ist, *Heidelb.* Din  
 ist; *Strassb.* weder ze heis



- ze dem wil ich mich ziehen  
790 und solhen bû fliehen,  
den daz fiur und der hagel sleht  
und der wâc abe tweht,  
mit dem man ringet unde ie ranc.  
swaz man daz jâr aise lanc  
795 dar ûf gearbeiten mac,  
daz verliuset schiere ein halber tac.  
den bû den wil ich lâzen;  
er sî von mir verwâzen.  
ir minnent mich: deist billich.  
800 nû sihe ich gerne, daz mich  
iwer minne iht unminne.  
ob ir iuch rehter sinne  
an mir verstân kunnent,  
und ob ir mir gunnent  
805 guotes unde êren,  
sô lâzent mich kêren  
ze unserm herren Jêsu Krist,  
des gnâde alsô stæte ist,

---

799. *Besserung Lachmanns*: Strassb. das ist; Heidelb.  
u. Kol. kürzen 799—806. 805. *Besserung Haupts*:  
Strassb. Beide g.

- daz si niemer zergât,  
810 unde ouch zuo mir armen hât  
alsô grôze minne  
als zeiner küneginne.  
ich sol von mînen schulden  
ûz iuwern hulden  
815 niemer komen, wil ez got.  
ez ist gewisse sîn gebot,  
daz ich iu si undertân,  
wan ich den lîp von iu hân:  
daz leist ich âne riuwe.  
820 ouch sol ich mîne triuwe  
an mir selber niht brechen.  
ich hôrte ie daz sprechen:  
swer den andern frôuwet sô,  
daz er selbe wirt unfrô,  
825 und swer den andern krœnet  
und sich selben hænet,  
der triuwen ist ein teil ze vil  
gerne ich iu des volgen wil,  
daz ich iu triuwe leiste,  
830 und mir selber doch die meiste.  
welt ir mir wenden mîn heil,  
sô lâz ich iuch vil lîhte ein teil

ê nâch mir geweinen,  
ich enwelle mir erscheinen,  
835 wes ich mir selber schuldec bin.  
ich wil iemer dâ hin,  
da ich ganze fröude vinde.  
ir hânt doch mê kinde:  
diu lânt iuwer fröude sîn,  
840 und getröestent ir iuch mîn.  
wan mir mac daz nieman erwern,  
zwâre, ich enwelle ernern  
mînen herren unde mich.  
muoter, jâ hôrte ich dich  
845 klagen unde sprechen ê,  
ez tæte dîme herzen wê,  
soltest dû ob mîme grabe stân.  
des wirst dû harte wol erlân:  
dû stâst ob mîme grabe niht.  
850 wan dâ mir der tût geschiht,  
daz enlât dich niemen sehen:  
ez sol ze Salerne geschehen.  
des tôdes des genese wir,  
und ich doch verre baz dan ir.“

---

844. *Strassb.* ioch; *Heidelb. Kol.* ich horte

- 855 Dô sî daz kint dô sâhen  
ze dem tôde sô gâhen  
und ez sô wislichen sprach  
unde menschlich reht zerbrach,  
sî begunden ahten under in,  
860 daz die wisheit und den sin  
niemêr erzeigen kunde  
kein zunge in kindes munde:  
sî jâhen, daz der heileg geist  
der rede wære ir volleist,  
865 der ouch Sente Niclauses pfîac,  
dô er in der wagen lac,  
und in die wisheit lêrte,  
daz er ze gote kêrte  
sîn kintliche gûete;  
870 und dâhten in ir gemûete,  
daz sî niht enwolten  
sî wenden noch ensolten,  
des sî sich hete an genomen:  
der wille si ir von gote komen.

---

856. *Besserung Haupts*; *Lachmann* sus: *Strassb. sa*,  
*Heidlb. Kol.* also 863. *HSS.* heilige 865. *Bes-*  
*serung Lachmanns*: *Kol.* sente Niclaus, *Strassb.*  
*sancten Niclaweses*, *Heidlb.* sente Nycolaus

- 875 von jâmer erkalte in der lîp,  
dô der meier und sîn wîp  
an dem bette sâzen  
und vil gar vergâzen  
durch des kindes minne  
880 der zungen und der sinne  
sâ ze der selben stunde.  
ir enwederz enkunde  
einec wort gesprechen.  
daz gegihte begunde brechen  
885 die muoter von leide.  
sus gesâzen si beide  
riuweg unde unfrô,  
unz sî sich bedâhten dô,  
waz in ir trûren töhte:  
890 sô man ir doch niht enmöhte  
benemen ir willen unde ir muot,  
so enwære in niht alsô guot,  
sô daz sî irs wol gunden,  
wan sî doch niht enkunden

---

881. *Besserung Haupts: Strassb. So; Heidelb. Kol.*

An den selben stunden also daz sie enkunden

883. *Strassb. Ein einig; Heidelb. Kol. Ein wort*  
niht

895 ir niemer werden âne baz,  
 enpfîngen sî der rede haz,  
 ez möhte in umbe ir herren  
 vil harte wol gewerren,  
 und verviengen anders niht dâ mite.

900 mit vil willeclîchem site  
 jâhen sî beide dô,  
 daz sî der rede wâren frô.

Des fröute sich diu reine maget.

dô ez vil kûme was getaget,  
 905 dô gie sî, dâ ir herre slief.  
 sîn trûtgemahеле ime rief;  
 sî sprach „herre, slâfent ir?“  
 „nein ich, gemahеле. sage mir,  
 wie bistû hiute alsô fruo?“  
 910 „herre, dâ twinget mich derzuo  
 der jâmer inwerr siecheit.“  
 „gemahеле, daz ist dir leit:  
 daz erzeigest dû an mir wol,  
 als ez dir got vergelten sol.  
 915 nune mag es ander rât sîn.“

---

912. *Strassb.* Er sprach gemahel, *Heidelb. Kol.* daz  
 weiz ich wol    915. *Strassb.* Nu mag es dekein  
 ander; *Heidelb. Kol.* iz rat niht gesin

- „entriuwen, lieber herre mîn,  
iuwer wirt vil guot rât.  
sît ez alsus umbe iuch stât,  
daz man iu gehelfen mac,  
920 ichn gesûme iuch niemer tac.  
herre, ir hânt uns doch gesaget,  
ob ir hetent eine maget,  
diu gerne den tût durch iuch lite,  
dâ soltent ir genesen mite,  
925 diu wil ich, weiz got, selbe sîn:  
iwer leben ist nûtzer dan daz mîn.“  
Dô gnâdete ir der herre  
des willen harte verre,  
und ervolleten im diu ougen  
930 von jâmer alsô tougen.  
er sprach „gemahele, ja ist der tût  
iedoch niht ein senftiu nôt,  
als dû dir lîhte hâst gedâht.  
dû hâst mich des wol innen brâht:  
935 möhtestû, dû huldest mir.  
des gnüege mich wol von dir.  
ich erkenne dinen süezen muot;

---

931. *Heidelb. Kol.* ia en ist, *Strassb.* ioch ist

- dîn wille ist reine unde guot:  
ich ensol ouch mê von dir gern.  
940 dû maht mich des niht wol gewern,  
daz dû dâ gesprochen hâst.  
die triuwe, die du an mir begâst,  
die sol dir vergelten got.  
diz wær der lantliute spot,  
945 swaz ich für dise stunde  
mich arzenien underwunde,  
und mich doch niht vervienge,  
wan als ez doch ergienge.  
gemahele, dû tuost als diu kint,  
950 diu dâ gæhes muotes sint:  
swaz den kumt in den muot,  
ez sî übel oder guot,  
dar zuo ist in alles gâch,  
und geriwet sî sêre dar nâch.  
955 gemahle, alsô tuost ouch dû.  
der rede ist dir ze muote nû:  
der die von dir nemen wolte,

---

939. *Strassb.* ouch niut me, *Heidelb. Kol.* Ichn sol an  
dich niht gern      953. *Besserung Lachmanns:*  
*Strassb.* allen; *Heidelb. Kol.* wirt in vil g.



- sô manz danne enden solte,  
sô geriuwez dich vil lîhte doch.“  
960 und daz sî sich ein teil noch  
baz bedæhte, des bat er.  
er sprach „dîn muoter und dîn vater,  
die enmugen dîn niht wol enbern.  
ichn sol ouch niht ir leides gern,  
965 die mir ie gnâde tâten.  
swaz sî dir beide râten,  
liebiu gemahеле, daz tuo.“  
hie mite lachete er dar zuo,  
wan er lûtzел sich versach,  
970 daz doch sider dô geschach.  
Sus sprach er zuo der guoter.  
der vater und diu muoter  
sprâchen „lieber herre,  
ir hânt uns vil verre  
975 geliebet unde geêret:  
daz enwær niht wol bekêret,  
wir engeltenz iu mit guote.

---

964. *Heidelb. Kol.* ichn wil, *Strassb.* Ich sol

967. *Strassb.* Liebe; *Heidelb. Kol.* Liebes kint des  
volge du

- unser tochter ist ze muote,  
daz sî den tût durch iuch dôl:  
980 des gunne wir ir harte wol.  
ez ist hiute der dritte tac,  
daz sî uns allez ane lac,  
daz wir ir sîn gunden:  
nû hât siz an uns funden.  
985 nû lâz iuch got mit ir genesen:  
wir wellen ir durch iuch entwesen.“  
Do im sîn gemahle dô bôt  
für sînen siechtuom ir tût  
unde man ir ernst ersach,  
990 dô wart dô michel ungemach  
und jæmerlich gebærde.  
mislichiu beswærde  
huop sich dô under in,  
zwischen dem herren unde in drin.  
995 ir vater unde ir muoter die  
erhuoben michel weinen hie:  
des weinens tet in michel nôt  
umb ir vil lieben Kindes tût.

---

991. 992. *Heidelb. Kol.* Rvweclich gebere vnd misliche  
swere; *Strassb.* Manige misliche beswerde

- nû begunde ouch der herre  
1000 gedenken alsô verre  
an des kindes triuwe,  
und begreif in ouch ein riuwe,  
daz er sêre weinen began,  
und zwîvelte vaste dran,  
1005 weder ez bezzer getân  
möhte sîn oder verlân.  
von vorhten weinde ouch diu maget:  
sî wânde, er wære dran verzaget.  
sus wâren si alle unfrô.  
1010 sî gerten keines dankes dô.  
Ze jungest dô bedâhte sich  
ir herre, der arme Heinrich,  
und begunde sagen in  
grôze gnâde allen drin  
1015 der triuwen und des guotes:  
diu maget wart rîches muotes,  
daz ers gevolgete gerne;  
und bereite sich ze Salerne,  
so er schiereste mohte.  
1020 swaz ouch der maget tohte,  
daz wart vil schiere bereit,  
schœniu pfert und richiu kleit,

diu si getruoc nie vor der zît:  
hermîn unde samit,

1025 den besten zobel, den man vant,  
daz was der maget gewant.

Nû wer möhte volgesagen  
die herzeriuwe und daz klagen  
unde ir muoter grimmez leit  
1030 und ouch des vater arbeit?  
ez wær wol under in beiden  
ein jæmerlichez scheiden,  
dô si ir liebez kint von in  
gefrumten sô gesundez hin  
1035 nimer mê ze sehenne in den tôt,  
wan daz in senftet ir nôt  
diu reine gotes gûete,  
von der doch daz gemûete  
ouch dem jungen kinde quam,  
1040 daz ez den tôt gerne nam.  
ez was âne ir rât komen:  
dâ von wart von ir herzen gnomen  
alliu klage und swære,

---

1031. *Strassb.* Es enwere; in *Heidelb. u. Kol.* fehlen  
1031. 1032.

wan ez anders wunder wære,  
1045 daz in ir herze niht zerbrach.  
ze liebe wart ir ungemach,  
daz si dar nâch deheine nôt  
liten umbe ir kindes tôt.

Sus fuor gegen Salerne  
1050 frœlich unde gerne  
diu maget mit ir herren.  
waz möht ir nû gewerren,  
wan daz der wec sô verre was,  
daz si sô lange genas?

1055 und do er si vollebrâhte  
hin, als er gedâhte,  
dâ er sinen meister vant,  
dô wart ime zehant  
vil frœlichen gesaget,

1060 er hete brâht eine maget,  
die er in gewinnen hiez;  
dar zuo er in si sehen liez.

Daz dûhte in ungelouplich.  
er sprach „kint, wede hâstû dich

---

1046. *Besserung Haupts: Strassb. die liebe; Heidelb.*  
*Kol. was in*

1065 diss willen selbe bedâht?  
od bistû ûf die rede brâht  
von bete od dînes herren drô?“  
diu maget antwurt im alsô,  
daz sî die selben ræte

1070 von ir selber herzen tæte.

Des nam in miçhel wunder,  
und fuorte sî besunder  
und beswuor sî vil verre,  
ob ir iht ir herre

1075 die rede hete ûz erdrôt.  
er sprach „kint, dir ist nôt,  
daz dû dich berâtest baz,  
und sage dir rehte, umbe waz.  
ob dû den tôt liden muost

1080 und daz niht vil gerne tuost,  
sô ist dîn junger lîp tôt,  
und frumt uns leider niht ein brôt.  
nu enhil mich dînes willen niht.  
ich sage dir, wie dir geschiht.

---

1065. *Strassb.* Dis      1066. 1067. *Strassb.* oder  
1065—1067. *Heidell. Kol.* Dise rede selber an ge-  
numen oder bistu hie zu bekumen Von dines herren  
dro

- 1085 ich ziue dich ûz rehte blôz,  
und wirt dîn schame harte grôz,  
die dû von schulden danne hâst  
unde nacket vor mir stâst.  
ich binde dir bein und arme:  
1090 ob dich dîn lîp .erbarme,  
sô bedenke disen smerzen.  
ich snîde dich zem herzen  
und brich ez lebende ûz dir:  
fröuwelîn, nû sage mir,  
1095 wie dîn muot dar umbe stê.  
ezn geschach kinde alsô wê,  
als dir muoz von mir geschehen.  
daz ich ez tuon sol unde sehen,  
dâ hân ich michel angest zuo:  
1100 nû gedenke selbe ouch dar zuo.  
geriuwet ez dich hâres breit,  
sô hân ich mîn arbeit  
unde dû den lîp verlorn.“  
vil tiure wart sî aber besworn,  
1105 si erkante sich vil stæte,  
daz sî sichs abe tæte.

- Diu maget lachende sprach,  
wan sî sich des wol versach,  
ir hulfe des tages der tôt  
1110 ûz werltlicher nôt,  
„got lône iu, lieber herre,  
daz ir mir alsô verre  
hânt die wârheit gesaget.  
entriwen, ich bin ein teil verzaget:  
1115 mir ist zwîvel geschehen.  
ich wil iu rehte bejehen,  
wie der zwîvel ist getân,  
den ich nû gewonnen hân.  
ich fürhte, daz unser arbeit  
1120 gar von iuwerr zageheit  
under wegen belibe.  
iwer rede gezæme eim wîbe.  
ir sint eines hasen genôz.  
iwer angest ist ein teil ze grôz  
1125 dar umbe, daz ich sterben sol.  
dêswâr, ir handelnt ez niht wol

---

1110. *Strassb.* vzer; in *Heidell. u. Kol.* 1107—1118  
gekürzt. 1115. *Besserung Haupts*: *Strassb.* be-  
sehen



- mit iuwer grôzen meisterschaft.  
ich bin ein wîp und hân die kraft:  
geturrent ir mich sniden,  
1130 ich getar ez wol erliden.  
die engesliche arbeit,  
die ir mir vor hânt geseit,  
die hân ich wol ân iuch vernomen.  
zwâr, ich enwære her niht komen,  
1135 wan daz ich mich weste  
des muotes alsô veste,  
daz ich ez wol mac dulden.  
mir ist, bî iuvern hulden,  
diu brœde varwe gar benomen  
1140 und ein muot alsô vester komen,  
daz ich als engesliche stân,  
als ich ze tanze stûle gân;  
wan dehein nôt sô grôz ist,  
diu sich in eines tages frist  
1145 an mime lîbe geenden mac,  
mich endunke, daz der eine tac

---

1143. *Besserung Haupts: Strassb. Wande kein; Heidelb.*  
*Kol.* Wie groz daz min angst ist der tot sich in  
einer vrist — mich dunket

- genuoc tiure sî gegeben  
umbe daz êwige leben,  
daz dâ niemer zergât.  
1150 iu enmac, als mîn muot stât,  
an mir niht gewerren.  
getrûwent ir mîm herren  
sînen gesunt wider geben  
und mir daz êwige leben,  
1155 durch got, daz tuont enzît:  
lânt sehen, welch meister ir sît.  
mich reizet vaste dar zuo.  
ich weiz wol, durch wen ich ez tuo:  
in des namen ez geschehen sol,  
1160 der erkennet dienst harte wol  
und lâts ouch ungelônnet niht.  
ich weiz wol, daz er selbe giht,  
swer grôzen dienst leiste,  
des lôn sî ouch der meiste.  
1165 dâ von sô sol ich disen tôt

---

1153. *Besserung Lachmanns: Strassb.* Sine gesunde;  
*in Heidelb. u. Kol. fehlen 1149—1154.* 1161. *Bes-*  
*serung Lachmanns: Strassb.* Vnd lat sin ouch,  
*Heidelb. Kol.* Er let sin

hân für eine süeze nôt  
nâch sus gewissem lône.  
liez ich die himelkrône,  
sô het ich alwæren sin,  
1170 wan ich doch lîhtes künnes bin.“

Nû vernam er, daz sî wære  
gnuog unwandelbære,  
und fuorte sî wider dan  
hin zuo dem siechen man  
1175 und sprach zuo ir herren  
„uns kan daz niht gewerren,  
iwer maget ensî vollen guot.  
nû hânt frœlîchen muot:  
ich mache iuch schiere gesunt.“

1180 hin fuort er sî zestunt  
in sîn heimlich gemach,  
da es ir herre niht ensach,  
und beslôz im vor die tür  
und warf einen rigel für:  
1185 er enwolte in niht sehen lân,  
wie ir ende solte ergân.

---

1183. *Besserung Lachmanns: Strassb. in vor der;  
Heidelb. Kol. Einen rigel warf er fur die tur der  
arme heinrich beleip da fur*

- In einer kemenâten,  
die er vil wol berâten  
mit siner arzenie vant,  
1190 er hiez die maget alzehant  
abe ziehen diu kleit.  
des was sî frô und gemeit:  
sî zarte diu kleider in der nât.  
schiere stuont sî âne wât  
1195 und wart nacket unde blôz:  
sî schamte sich niht hâres grôz.  
Dô sî der meister ane sach,  
in sime herzen er des jach,  
daz schoener crêatiure  
1200 al der werlte wære tiure.  
gar sêre erbarmete sî in,  
daz im daz herze und der sin  
vil nâch was dar an verzaget.  
nû ersach diu guote maget  
1205 einen hôhen tisch dâ stân:  
dâ hiez si der meister ûf gân.  
daz ûf er sî vil vaste bant  
und begunde nemen in die hant  
ein scharpfez mezzet, daz dâ lac,  
1210 des er ze solhen dingen pflac.

- ez was lang unde breit,  
wan daz ez sô wol niht ensneit,  
als im wære liep gewesen.  
dô sî niht solte genesen,  
1215 dô erbarmete in ir nôt,  
und wolte ir sanfte tuon den tât.  
Nû lac dâ bî in ein  
harte guot wetzestein:  
dâ begunde erz ane strichen  
1220 harte müezeclichen,  
dâ bî wetzen. daz erhôrte,  
der ir fröude stôrte,  
der arme Heinrich, hin für,  
dâ er stuont vor der tür,  
1225 und erbarmete in vil sêre,  
daz er sî niemer mêre  
lebende solte gesehen.  
nû begunde er suochen unde spehen,  
unze daz er durch die want  
1230 ein loch gânde vant,

---

1221. *Besserung Lachmanns: Strassb. Do bi ouch w.;  
Heidelb. Kol. Do er daz strichen h. sine vreude gar  
verstorte*

und ersach sî durch die schrunden  
nacket und gebunden.

Ir lîp der was vil minneclich.  
nû sach er sî an unde sich  
1235 und gewan einen niuwen muot.  
in dûhte dô daz niht guot,  
des er ê gedâht hâte,  
und verkêrte vil drâte  
sîn altez gemûete  
1240 in eine niuwe glûete.

Nû er sî alse schœne sach,  
wider sich selben er dô sprach  
„dû hâst ein tumben gedanc,  
daz dû sunder sînen danc  
1245 gerst ze lebenne einen tac,  
wider den niemen niht enmac.  
du enweist ouch rehte, waz dû tuost,  
sît dû benamen sterben muost,  
daz dû diz lesterlîche leben,  
1250 daz dir got hât gegeben,  
niht vil willeclîchen treist,

---

1237. 1238. *Strassb.* Des er do e gedahte — vil ge-  
trahte; in *Heidelb. u. Kol.* fehlen 1233 — 1240.

unde ouch dar zuo enweist,  
 ob dich diss kindes tôt ernert.  
 swaz dir got hât beschert,  
 1255 daz lâ dir allez geschehen.  
 ich enwil diss kindes tôt niht sehen.“

Des bewag er sich zehant  
 und begunde bôzen an die want:  
 er hiez sich lâzen dar in.  
 1260 der meister sprach „ich enbin  
 nû niht müezec dar zuo,  
 daz ich iu iht ûf tuo.“  
 „nein, meister, gesprechent mich.“  
 „herre, jâ enmach ich.  
 1265 beitent, unz daz diz ergê.“  
 „nein, gesprechent mich ê.“

---

1253. *Strassb. dis, Heidelb. Kol. des* 1256. *Strassb.*  
*dis; Heidelb. Kol. dunen macht ires todes niht*  
*gesehen* 1263. *Besserung Lachmanns: Strassb.*  
*Nein herre meister; in Heidelb. u. Kol. fehlen* 1263.  
 1264. 1264. *Strassb. Herre sprach er ioch*  
*enmag ich* 1266. *Strassb. Nein herre meister*  
*gesprechent, Heidelb. Kol. Neina meister sprechet*  
*(Kol. besprechet)*

„nû sagent mirz her durch die want.“

„jâ ist ez niht alsô gewant.“

Zehant dô liez er in dar in.

1270 dô gie der arme Heinrich hin,  
dâ er die maget gebunden sach.  
zuo dem meister er dô sprach  
„diz kint ist alsô wûnneclîch:  
zwâre, jâ enmach ich

1275 sînen tût niht gesehen.  
gotes wille müeze an mir geschehen:  
wir suln sî wider ûf lân.  
als ich mit iu gedinget hân,  
daz silber, daz wil ich iu geben.

1280 ir sult die maget lâzen leben.“

Dô diu maget rehte ersach,  
daz ir ~~in~~ sterben niht geschach,  
dâ was ir muot beswæret mite.  
sî brach ir zuht unde ir site:

1285 sî gram unde roufte sich.

---

1268. *Strassb.* Ioch; in *Heidelb. u. Kol.* fehlen 1267.

1268. 1274. *Strassb.* Zwar ioch, *Heidelb. Kol.*  
weizgot nu; *alle drei* enmag ich. 1285. *Strassb.*  
Zuo grime zart siu sich vnd, *Heidelb. Kol.* Sie  
roufte vnd kratzte



ir gebærde wart sô jæmerlich,  
 daz sî niemen hete gesehen,  
 im wære ze weinene geschehen.

Vil bitterlichen sî schrê

1290 „wê mir vil armen unde owê!

wie sol ez mir nû ergân?  
 muoz ich alsus verlorn hân  
 die rîchen himelkrône?  
 diu wære mir ze lône

1295 gegeben umbe dise nôt.

nû bin ich alrêst tôt.  
 owê, gewaltiger Krist!  
 waz êren uns benomen ist,  
 mînem herren unde mir!

1300 nu enbirt er und ich enbir  
 der êren, der uns was gedâht.

ob diz wære vollebrâht,  
 sô wære ime der lîp genesen  
 und müeste ich iemer sælec wesen.“

1305 Sus bat si gnuoc umbe den tôt.  
 dô wart ir nie dernâch sô nôt,

---

1291. *Besserung Lachmanns: Strassb.* nu gar ergan;  
*Heidelb. Kol.* Daz ich ie wart geborn nu han ich  
 alrerst verlorn

- sî verlûre gar ir bete.  
dô niemen durch sî dô niht tete,  
dô huop sî an ein schelten.
- 1310 sî sprach „ich muoz engelten  
mînes herren zageheit.  
mir hânt die liute misseseit:  
daz hân ich selbe wol ersehen.  
ich hôrte ie die liute jehen,
- 1315 ir wærent biderbe unde guot  
und hetent vesten mannes muot:  
sô helf mir got, sî hânt gelogen.  
diu werlt was ie an iu betrogen:  
ir wærent ie alle iuwer tage
- 1320 und sint ouch noch ein werltzage.  
des nim ich wol dâ bî war:  
daz ich doch liden getar,  
des enturrent ir niht dulden.  
herre, von welhen schulden
- 1325 erschrâkent ir, dô man mich bant?  
ez was doch ein dickiu want  
enzwischen iu unde mir.  
herre mîn, geturrent ir
- 
1323. *Strassb.* Daz engetûrrent; *Heidelb. Kol.* Des  
entravt er niht verdulden

einen frömden tôt niht vertragen?

- 1330 ich wil iu geheizen unde sagen,  
daz iu niemen niht entuot,  
und ist iu nütze unde guot.“

Swie vil sî flüeche unde bete  
unde ouch scheltens getete,

- 1335 daz enmohte ir niht frum wesen:  
sî muoste iedoch genesen.  
swaz dô scheltennes ergie,  
der arme Heinrich ez enpfie,  
als ein frumer ritter sol,

- 1340 tugentlichen unde wol,  
dem schœner zûhte niht gebrast.  
und dô der gnâdelôse gast  
sîne maget wider kleite  
und den arzât bereite,

- 1345 als er gedinget hâte,  
dô fuor er gar drâte  
wider heim ze lande.  
swie wol er dô erkande,  
daz er dâ heime funde

- 1350 mit gemeinem munde  
niuwan laster unde spot,  
daz liez er liuterlich an got.

- Nû hete sich diu guote maget  
sô verweinet und verklaget,  
1355 vil nâhe hin unz an den tôt.  
do erkande ir triuwe unde ir nôt  
*cordis speculator*,  
vor dem deheines herzen tor  
fürnames niht beslozzen ist.  
1360 sit er durch sînen sîezen list  
an in beiden des geruochte,  
daz er sî versuochte  
reht alsô volleclichen  
sam Jôben den rîchen,  
1365 do erzeugte der heilige Krist,  
wie lieb ime triuwe ist,  
und schiet sî dô beide  
von allem ir leide  
und machete in dâ zestunt  
1370 reine unde wol gesunt.

- Alsus bezzerte sich  
der guote herre Heinrich,  
daz er tîf sînem wege  
von unsers herren gotes pflege  
1375 harte schoene worden was,  
daz er vil gar genas

- und was als von zweinzec jâren.  
dô sî sus erfröuwet wâren,  
do enbôt erz heim ze lande  
1380 den, die er erkande  
der sælden und der gûete,  
daz si in ir gemüete  
sines gelückes wæren frô.  
von schulden muosten sî dô  
1385 von den genâden fröude hân,  
die got hâte an ime getân.  
Sine friunde die besten,  
die sine kunft westen,  
die riten unde giengen,  
1390 durch daz sî in enpfîngen,  
gegen im wol dri tage.  
si engeloubten niemens sage  
danne ir selber ougen.  
sî kurn diu gotes tougen  
1395 an sîme schœnen libe.  
dem meier und sînem wîbe,  
den mac man wol gelouben,  
man welle si rehtes rouben,

---

1377. HSS. vor

- daz sî dâ heime niht beliben.  
1400 sî ist iemer ungeschriben,  
diu fröude, die sî hâten,  
wan sî got hete berâten  
mit lieber ougen weide:  
die gâben in dô beide  
1405 ir tohter unde ir herre.  
ez enwart nie fröude merre,  
danne in beiden was geschehen,  
dô sî hâten gesehen,  
daz sî gesunt wâren.  
1410 si enwesten wie gebâren,  
ir gruoꝝ wart spâhe undersniten  
mit vil seltsænen siten:  
ir herzeliep wart alsô grôꝝ,  
daz in daz lachen begôꝝ  
1415 der regen von den ougen.  
diu rede ist âne lougen:

---

1410. *Besserung Lachmanns*: Strassb. wie siu g.;  
Heidelb. Kol. kürzen 1406 — 1410. 1411. Strassb.  
spehe; Heidelb. Kol. Der gruz was vnder sn.  
1413. *Besserung Haupts*: Strassb. herze liebe;  
Heidelb. Kol. Mit drivalder vreude grôꝝ

sî kusten ir tochter munt  
etewaz mê dan dristunt.

- Do enpfingen sî die Swâbe  
1420 mit lobelicher gâbe:  
daz was ir willeclicher gruoꝝ.  
got weiz wol, den Swâben muoꝝ  
ieglich biderber man jehen,  
der sî dâ heime hât gesehen,  
1425 daz bezzers willen niene wart.  
als in an sîner heimvart  
sîn lantliut enphienge,  
wie ez dar nâch ergienge,  
waz mag ich dâ von sprechen mê?  
1430 wan er wart rîcher vil dan ê  
des guotes und der êren.  
daz begunde er allez kâren  
stæteclîchen hin ze gotē  
unde warte sîme gebote

---

1425. *Besserung Haupts*: Strassb. wille nie enwart;  
Heidelb. Kol. Daz grozer vreude nie wart  
1426. Strassb. ime 1428. Strassb. Vnd wie;  
Heidelb. Kol. 1426 — 1428 Swie es an iren (Kol.  
irem) heimvart Vurbaz ergienge oder wie sie in  
enpfingen (Kol. enpfinge)

1435 baz, danne er ê tæte.  
des ist sîn êre stæte.

Der meier und diu meierin,  
die heten ouch vil wol umb in  
verdienet êre unde guot.

1440 ouch het er niht sô valschen muot,  
sî hetenz harte wol bewant.  
er gap in ze eigen daz lant,  
daz breite geriute,  
die erde und die liute,

1445 da er dâ siecher tîfe lac.  
sîner gemahelen er dô pflac  
mit guote und mit gemache  
und mit aller slahte sache  
als sîner frouwen oder baz:

1450 daz reht gebôt ime daz.

Nû begunden im die wîsen  
râten unde prîsen  
umb êlichen hîrât.  
ungesamnet was der rât.

1455 er seite in dô sînen muot:  
er wolte, diuht ez sî guot,

---

1453. *Kol. Heidelb.* Vmbe eliche (elich) vriat



- nâch sînen friunden senden  
und die rede mit in enden,  
swaz sî es ime rieten.
- 1460 biten und gebieten  
hieʒ er allenthalben dar,  
die sînes wortes nâmen war.  
do er sî alle dar gewan,  
beide mâge unde man,
- 1465 dô tet er in die rede kunt.  
nû sprach ein gemeiner munt,  
ez wære reht unde zît.  
hie huop sich ein michel strît  
an dem râte under in:
- 1470 dirre riet her, der ander hin,  
als ie die liute tâten,  
dâ sî dâ solten râten.
- Dô ir rât was sô mislich,  
dô sprach der arme Heinrich
- 1475 „îu ist allen wol kunt,  
daz ich vor kurzer stunt

---

1459. *Strassb.* Swa; in *Heidelb. u. Kol.* fehlen 1459 —  
1462. 1475. *Besserung Haupts:* *Strassb.* Vch  
herren ist, *Heidelb. Kol.* Nu ist euch; *ebenso* 1493.

was vil ungenæme,  
den liuten widerzæme.  
nu enschiuht mich weder man noch wîp:

1480 mir hât gegeben gesunden lîp  
unsers herren gebot.

nû rât mir alle durch got,  
von dem ich die genâde hân,  
die mir got hât getân,

1485 daz ich gesunt worden bin,  
wie ichz verschulde wider in.“

Sî sprâchen „nement einen muot,  
daz im lîp unde guot  
iemer undertæne sî.“

1490 sîn trûtgemahele stuont dâ bî;  
die er vil gûetlîch ane sach.  
er umbevienc sî unde sprach  
„iu ist allen wol gesaget,  
daz ich von dirre guoten maget

1495 mînen gesunt wider hân,  
die ir hie sehent bî mir stân.  
nû ist sî frî, als ich dâ bin:  
nû ræt mir aller mîn sin,  
daz ich sî ze wîbe neme.

1500 got gebe, daz ez mir gezeme:

- sô wil ich sî ze wîbe hân.  
zwâre, mac daz niht ergân,  
sô wil ich sterben âne wîp,  
wan ich êre unde lîp  
1505 hân von ir schulden.  
bî unsers herren hulden  
wil ich iuch biten alle,  
daz ez iu wol gevalle.“  
Nû sprâchen si alle gelîche,  
1510 bêde arm und rîche,  
ez wære ein michel fuoge.  
dâ wâren pfaffen gnuoge:  
die gâben si ime ze wîbe.  
nâch stûezem lanclîbe,  
1515 dô besâzen sî gelîche
- 

1513. *Schluss nach Heidelb. u. Kol.*

Die gaben sie im zu einer [elichen] kone.  
nach werltlicher wone  
Wolden sie beide niht.  
zweier engel zuversiht  
Schein an in beiden,  
do sie sich musten scheiden.  
Er hette sie wol beslafen  
nach werltlichem schafen:

daz êwige rîche.  
als mûeze ez uns allen  
ze jungest gevallen.  
der lôn, den sî dâ nâmen,  
1520 des helfe uns got. âmen.

---

Vor gote sichs (*HSS.* er sichez) getroster (*Heidelb.*  
getroste).

er tet sie (*HSS.* sich) in ein kloster  
Und bevalch sich der vrien  
gotes muter sente marien  
Da bi in einen tum.  
wie mocht er immer baz getun?  
Da verdienten sie beide geliche  
daz vrone himelriche.  
Daz lon muez (uns) allen  
ze jungest gevallen,  
Daz sie da genamen.  
des helfe uns got. amen.  
[Durch siner martir ere.  
nu en ist der rede niht mere.]

---

# **SANCT SILVESTER.**

**TISCHREDE**

**AUS DEM BUCH VON DER HEILIGEN LEBEN**

**VON HERMANN VON FRITZLAR.**

**Pfeiffers Deutsche Mystiker des vierzehnten Jahrhunderts**  
**1, 41 — 44.**

## SANCTE SILVESTERS TAC.

---

Ir sult wizzen, daz dirre babist was arm,  
und me danne zwenzig bebiste vor ime, di  
warn alle arm. Aber wi her riche wart, daz  
hort. (S. 42.) Ein keiser was zu Rome, der  
hiz Constantinus. Der was ein vient krist- 5  
ens glouben, und wo her kristine lute be-  
greif, da liz her si toten. Des nachtes, do  
her lag uf sinem bette, do quam ein engel  
und brachte ein vaz mit wazzere und schut  
iz uf in, und her wart zu male uzsetzic. Do 10  
sante he noch allen den erzeten, di her ge-  
langen mochte in aller der werlde, und ni-  
mant kunde ime gehelfen. Do quamen wise  
meistere von Krichen lande und sprachen,  
hete her junger kinde blutes also vil, daz 15

her dinne stunde wan an sinen hals, so solde  
her gesunt werden. Do liz her vahn alle  
di kindere, di under muter suge warn, als  
verre, als her si gereichen mochte mit rom-  
5 escher gewalt, und furte si zu Rome unde  
wolde si verterben. Di vetere und di mutere  
der kindere volgeten nach mit grozeme ge-  
schreie. Si rizzen ire kleidere und rouften  
uz ir har und kratzten ire wangen, als in  
10 den landen site ist. Diz jamer schal uber  
alle di stat zu Rome. Do iz vor den keiser  
quam, do vregete her, waz deme volke were,  
daz si also jemerlichen teten. Do seiten si  
ime, daz iz di vetere und di mutere weren  
15 der kinder, di man solde toten. Do sprach  
her „di keisere han ein gesetze getan, wer  
unschuldig blut guzet oder kinder totet, er  
si di swert gezihen mugen, der sul sterben  
des todes. Diz gesetzede wolle wir halden.  
20 Des enwollen di gote nit, daz durch min  
lebin also vil lute betrubit werden und

---

13. *Bei Pfeiffer Dâ*



sterben“ und gebot, daz man in di kinder wider gebe und silbers und goldes dar zu alse vile, daz si mit frouden quemen in ir hus. Dise barmherzikeit behagete gote. Do der keiser lag in sinem bette und ime di 5 uzsetzikeit sere we tet, daz her weder slafen noch ligen noch sitzen mochte, do irschein ime sente Peter und sente Paulus und sprachen „gegruzet sistu, Constantinus!“ Do sprach her „wer ist daz?“ Do seiten si ime „wir sin di 10 fursten von Rome und wollen dich leren, daz du gesunt wirst. Du salt senden nach deme babiste hi zu Rome: der heizet Silvester; der sal dich gesunt machen.“ Do verschwunden si, und der keiser wart sere vro 15 unde was doch betrubet, wan her nicht wiste, wo her was, und sante uz in alle lant und gebot, wer in ime brechte, deme wolde her geben gut und ere. Do was sente Silvester wol zwenzig mile von Rome in eime grozen 20 gebirge und arbeitete da mit sinen pfaffen daz ertriche, daz si sich generten. Do quamen des keisers knechte und vregeten in, wi her

- hize. Do sprach her „ich heize Silvester.“  
Do wurden si sere vro und namen in und  
brachten in deme keisere. Do wonde sente  
Silvester, daz her in marteren wolde, und  
5 was vro. Der keiser sprach „mir irschinen  
hint zwene gote: di seiten mir, du soldes  
mich gesunt (S. 43.) machen.“ Do hate her  
eine gemalte tafelen: da stunt sente Peter  
und sente Paulus ane; und sprach „di zwene,  
10 di dir erschin, waren dise also gestalt?“  
Do sprach her „ja.“ Do sprach Silvester  
„iz waren nit gote: si sin gotis knechte;  
der heizet einer Petrus und der ander Paulus.“  
Do sprach Silvester zu Constantino „wiltu  
15 gesunt werden, so mus du dri ding tun.  
Daz erste: du salt an Christum glouben.  
Daz andere: du salt dich lazen toufen. Daz  
dritte: du salt alle di apgote lazen zubrechen,  
di in Rome sint und in Romer lande.“ Do  
20 sprach Constantinus „an Christum zu gloubene  
und mich lazen toufen, daz ist mir licht zu  
tunne: aber di edelen apgote, daz ich di  
laze zubrechen, di unser eldern ane gebetet

han, daz ist mir swer zu tune. Doch ist iz mir bezzer, daz ich iz tun, wan daz ich also gequelit wurde und sturbe“ und gebot bi libe und bi gute, daz man di apgote alle brechen solde, und wer des nit entete bi drin 5 tagen, uber den solde gen daz romische urteil. Also wart Constantinus getouft von sente Silvestro und vil Romere und herren mit ime. Do diz sin muter gehorte sente Helena, do wart si sere betrubet und sante ime einen 10 brif und vil smelicher wort dar inne, also daz her begoukelt were und zoubernisse volgete. Do machte sich Constantinus uf mit sancto Silvestro, und namen mit in heilige lute, di gestetiget und gevestent waren in 15 dem glouben, und furen zu Jerusalem zu sente Helenen. Do nam si di wisesten juden zu samene, di si vinden mochte, und hilt eine groze disputazien wider sente Silvestern, also daz di juden namen einen grozen ossen 20 und sprachen ime sulche wort in sin ore, daz her starb. Aber si inmochten in nit wider lebende gemachen. Do sprach sente Silvester

„vile lute kunnen wol toten: aber Christus kan alleine lebende gemachen“ unde sprach „ich gebite dir in dem namen unses herren Jesu Christi, daz du lebest.“ Und der osse  
5 wart gesunt und starg also vore. Do bekarte sich sente Helena und der juden vile mit ir, und funden da daz heilige kruze, do lang vone were zu sagende, und sniten iz an dru stucke. Ein teil bleip zu Jerusalem; daz  
10 ander teil furten di meistere gen Constantinpels: wan si waren ouch gewest bi der disputazien; daz dritte teil furte Constantinus zu Rome mit grozen eren und sente Silvester mit ime. Do gap der keiser uf sine keiser-  
15 liche gewalt sente Silvestro und vil vor sine fuze und nam di kronen des riches von sinen fuzen und enduchte sich nit wirdig sin si zu nemene von den henden und erlaubite den bebisten und den bischoven und den  
20 pristeren gut zu habene. Do wart ein stimme gehort uber allez Rome: di sprach „hute ist di galle und di vergift gegozzen in di heiligen (S. 44.) kristenheit“. Und wizzet, daz diz

ist noch ein wurzele und ein gruntfestene  
alles kriges zwischen den bebisten und den  
keisern. Wie Constantinus lebite und sturbe  
und sante Silvester, da enwil ich nit me vone  
sprechen. 5

Von deme nuwen gebornen kinde. Man  
vreget, war umme got nit e mensche wurde,  
dan er tet. Daz sint vir sache. Di erste  
ist umme sunde, di da was in der werlde.  
Di ander sache was di menie der bosheit 10  
der werlde. Di dritte sache was: di heilige  
drivaldikeit di hate dise zit vor gesatzit.  
Di virde sache: wer got zu hant mensche  
worden, do Adam di sunde getan hate, so  
were von der lenge der zit der werke und 15  
der bilde unses herren vergezzzen, und weren  
kalt worden unde uninnig in der lute herzen  
\* daz got di begerunge der propheten gē-  
reizete, und di noch geboren sullen werden,  
erweckete und geinnigete. Do sprichit Paulus 20

---

9. ist stumme

„do di fullede der zit quam, do sante got  
sinen sun.“

Ein ander vrage ist, ab di ewige geburt  
des ewigen wortis in der sele keine kreature  
5 zu grunde versten muge. Also verre, also  
dise geburt got an gehort, also ist si un-  
verstentlich allen kreaturen: aber also verre,  
also si fruchtber ist und nutzber und di sele  
heliget und einiget mit gote, also verre ist  
10 si verstentlich.

Ein ander vrage ist, ab der vater von  
himelriche sin ewigez wort muge gesprechen  
in der sele, daz is di sele nit enpfinde oder  
wizze. Diz merket. Dise lute sint zweier  
15 leie. Di einen sint gemeine lute und grobe  
lute und sint wartende dirre geburte: wan si  
sint zu uzer und zustrowet und sint doch  
in der gnade gotis. In disen wirt dicke ge-  
born daz ewige wort, daz si is nicht enwizz-  
20 en. Iz sint ander lute: di sint vernunftige  
lute unde sint stetliche wonde in der in-

---

12. ewigen wort

rekeit irre sele und sint beitende und wartende des ewigen wortis. In disen wil der vater sin wort nummer gesprechen sunder ir gefulen und ir bekennen.

Nu ist aber ein vrage, ab ein mensche immer in diseme lebene also vollekomen moge werden, daz her ane underlaz gefule der ewigen geburt und si verste. Wizzit, daz vil vollekomenheit ist, di got der sele wol gebin mochte und gerne gebe: aber di sele 10 enheldet sich dar zu nicht und ubit sich dar zu nicht. Dar umme enlidet mensliche krankheit nit, daz der mensche stetecliche gefule unde bekenne dise geburt. Got mochte ez aber wol der sele geben zu einer sunder- 15 lichen gabe, als man hoffen mag von unser vrowen und von den aposteln, daz si einen steten vorwurf heten in irre vernunft.

Nu ende wir dise collazjen in der warheit, di wir vor gesprochen han, und bitet got vur 20 mich. AmeN.

---





# AMICUS UND AMELIUS.

AUS DER SEELE TROST.

**Durch Carové in dem Taschenbuch für Freunde altdeutscher  
Zeit und Kunst auf das Jahr 1816, S. 343—348.**

## AMICUS UND AMELIUS.

---

Liebes kint, du salt nit ungetruwe sin noch falsche. Wem das du gelobest truwe, dem saltu truwe halden und leisten. Nim ein exempel an zwein gesellen: do von wil ich dir sagen.

Zwei kinder worden geboren in eim lande: 5  
die hatte got glich gemacht, das niemants  
eins vor dem andern mocht erkennen. Der  
ein was eins grefen sone, und der ander  
was eins ritters sone. Die kinder dauft der  
babst zu Rome und nante des grefen son 10  
Amelius und des ritters son Amicus, und  
der babst gap in zwen neppe, glich gemacht  
von edelem holze. Und disse zwei kinder

---

9. *Bei Carocé* ein

gelobten getrue gesellschaft zu sin; diwil das sie lebten, so solden sie sich nit scheiden.

Amicus fatter starb, und die ungetruwen heren entfremten im alles sins vatter erbe  
5 und guit: do enwuste er kein wegk und wanderte zu sins gesellen Amelius. Den enfant er nit da heim: wan Amelius was gewandert zu Amicus hus und wolde in drosten. Des enwußte Amicus nit. Also  
10 sucht ir einer den andern von steden zu steden wol ein ganz jare. (S. 344.) Under des qwam er in eins ritters hus: der gab im sin dochter. Dar nach, da die brutschafft gescheen was, do ließ Amicus nit abe, er  
15 suchte sin gesellen Amelius. Do begegnet im ein bilgerin: dem gab Amicus sin rock uff das, das er got bede, das er sin gesellen finden mochte, und Amicus bat den bilgerin, ab er Amelius irgent sehe, das er im  
20 nach folgen wolde gein Paris. Des selben tages beqwam dem pilgerin Amelius zu mal

---

21. qwam der

in bosen snoden kleidern und was an dem antlitz gestalt als Amicus. Do wonte der bilgerin, daß eß Amicus were. Do wunderte er sich sere, war sin pert und sin cleider komen were. Da sprach Amelius zu dem 5 bilgerin „Du umbwanderst vil landes umb: hastu mir gesellen Amicus irgent geseen?“ Da sprach der pilgerin „war umb fragestu mich umb Amicus? du bist doch Amicus und gebe mir hude dissien rock und fraget 10 mich umb dinen gesellen Amelius. Da hette du pert und knecht: war sint die nu komen?“ Do sprach er „ich bin nit Amicus: ich bin im glich an dem antlitz, und ich heiß Amelius.“ Do sprach der pilgerin „du find- 15 est Amicus zu Paris.“ Und da fant er in, und in wart beiden wal zu mude; sie helsten und kosten sich einander und zogen beid in konig Karulus hoif. (S. 345.) Der konig entphing sie zu sim holfgesinde, und sie dienten 20 im also woll, das sie menlichen liep hatte.

Dar nach zu einer zit zoch Amicus heim zu siner husfrauwen und ließ Amelius bliben in des koninges hoif. Do hatte der konig ein dochter: die hatte Amelius lieb. Zu  
5 einer zit betroge Amelius die bekarunge, das er die jungfrauwen allein hatte, und det ir gewalt: des was sie sere betrubet. Da was in dem hoife ein grefe: dem was Amelius sunderlichen fruntliche; dem saget Amelius  
10 sin heimlichkeit und fraget in raits. Zu eim tage bewiste der grefe untruwe und melte in vor dem konig. Der konig wart zornig und fraget die dochter umb die sach. Sie sprach, der grefe solt das bezugen, und kunde das  
15 nit gethun. Do sprach der konig „Uwer einer sal den andern besten zo kemphen.“ Disse mere vernam Amicus und zoich hin vor des koniges hoif und fragete Amelius umb die sach, und Amelius bekant iß vor  
20 im, das er der jungfrauwen gewalt hatte getan. Do sprach er „so hastu bose fechten,

---

6. Jungfrauwe    8. graffe    17. zoith

wan du schuldig bist. Auch wil ich dir ein truwe bewisen: nim min phert, min kleider und min knecht und far hinne zu miner huisfrauwen: sie enkennet dich nit. Ich wil hie vor dich kempen. Ist, das ich sterben, 5 so behalt dir das wip; ist, das mir got hilft, so kome widder zu mir.“ Das geschach, das Amelius reit zu Amicus hus und zu siner huisfrauwen. Und sie entphieng in vor iren man, wan er (S. 346.) also geschaffen was 10 als Amicus. Under des gewan Amicus den kamp. Des abendes, wan sie slafen gingen, so nam Amelius sin swert und leit iß zwischen sie beide, und er sprach zu ir „berorestu mich, e ich wisse, wie iß minem gesellen gee, iß 15 kost dich din leben.“ Dar nach qwam im ein bode, das er komen solde zu sin gesellen. Und er det sin cleider wider an, und der konig gab im sin dochter. Disse dinge verhelten Amicus und Amelius under 20 ine, daß iß niemants wuste.

---

3. hiene      4. huisfraue

Dar nach uber ein lang zit, da plaget got  
Amicus, das er maletsch wart. Da ging sin  
huisfrauwe mit alle iren frunden und dreibe  
in uß alle sim gude, und er was krank und  
5 ubel gestalt, und kein mensche wolt mit im  
zu schicken han. Do must er werden ein  
betteler und ging von huse zu huse umb  
sin broit, und er enhatte nit mere von sim  
gude dan den napf, den im der babst hatt  
10 gegeben: dar uß drang und aße er. Do  
wanderte er zu sins gesellen hus und wolde  
sehen, ob er in nit kennen wolde. Do qwam  
er vor sin doir und rief „Gebet dem armen  
maletschen icht dorch gott.“ Da hatt Amelius  
15 den napph, den im der babst hatte gegeben,  
vor im uff dem disse stan. Do sprach er zu  
sim knecht „nim den napph und gip dem  
armen menschen, was da inne ist, in sinen  
napph, das er drink, und gib im auch dar  
20 zu, das er esse.“ Der knecht det also. Do  
der knecht wider qwam, do sprach er also

---

6. hen    11. zu *fehlt*.



zu sim heren „Here, der man hatte ein napph:  
der ist (S. 347.) gestalt glich uwer m napf.“  
Do der here das horte, do stund er uff von  
dem dische und drait vor die dore zu dem  
man und nam in in sine arme und koste in 5  
vor sinen munt und sprach „Amicus, min  
lieber frunt, bis got und mir wilkome! Alles,  
das ich han, das ist din.“ Da fraget er, wie  
er so arm were worden. Do sprach er „nu  
mich got geplaget hait mit diser sucht, derumb 10  
versmahet mich min huisfrauwe und alle  
mine frunde und hant mich vertreiben.“ Da  
sprach Amelius „du salt bi mir bliben, die  
wile du lebest.“ Also det Amicus und diente  
got mit grosser innigkeit. Do wolt unser 15  
here volkomende truwe ane in profen, und  
er sant sinen heiligen engel zu Amicus, und  
der sprach zu im „Wiltu gesunt werden, so  
gang zu dim gesellen Amelius und sage im,  
das er sin zwei kinder dode und besprenge 20  
dich mit dem bloide: so wirstu gesunt.“

Da Amicus Amelius das sagete, do wart er beide betrubet und erfraüet: er was betrubt, wan im swer was sin eigen kinder zu doden, und er was erfraüet, das sin geselle gesunt  
5 mocht werden. Eines tages, do sin huisfrauwe in der kirchen was, do ging er in sin kamer, do sin kinder in lagen uff dem bette. Da lachten sie in an. Da sprach er zu in betrubiglichen „Ach, lieben kinder, ir lachent  
10 mich an: ir wüßt nit, das ich uch doden sal.“ Und er zoich sin swert uß und doit sin kinder und sprach „O here Jesu Christ, siech diese martel an und verwisse iß mir nit, wan ich iß thun dorch recht truwe.“ Und  
15 er nam das bluit und besprewet Amicus da mide, und Amicus wart gesunt, und die frauwe enwist iß nit, das ir kinder doit waren. (S. 348.) Da was Amelius frolich, das sin gesell gesunt was worden, und doch ging er  
20 betrublich in die kamern, da die kinder inne lagen. Da er sie an sach, da lachten die kinder beide und spielten, und iglichs bete sinen vatter an, und iglichs hatte einen roden


strymeln umb den hals als ein syden faden:  
die behielden sie, diwil sie lebten. Da danket  
Amelius unserm lieben heren und saget disse  
ding siner huisfrauwen. Do gelobte sie kuß-  
heit unserm lieben heren: die wolde sie 5  
halden biß in iren doit.

Do die zwen frunde doit waren, do grub  
man jiglichem ein grap. Do vil das ein grap  
ine. Do wolden die lude wissen, was das  
bedudet, und gruben das grap uff und funden 10  
da nicht in. Da grub man das ander grab  
uff: do waren sie beide inne komen zu samen.  
Und Amicus wip, die in vertreibe, der brach  
der tufel den hals enzwei.

Liebe kint, dis sal dir ein lere sin, und 15  
bis getruwe.

---

7. zwey    9. ynne









Cornell University Library  
PT 1534.A6W11

Arno Heinrich ...



3 1924 026 150 163

**Cornell University Library**

**THE ZARNCKE LIBRARY**

**COLLECTED BY FRIEDRICH ZARNCKE**

**THE GIFT OF**

**William H. Sage**

**1893**

A. 58132

1/10/93

